



Sarajevo, 26.12.2025.godine

BOSNA I HERCEGOVINA
PARLAMENTARNA SKUPŠTINA BOSNE I HERCEGOVINE
SARAJEVO

PRIMLJENO: 26-12-2025			
Organizaciona jedinica	Klasifikaciona oznaka	Redni broj	Broj priloga
01	50-1-	2818/25	

**KOLEGIJU PREDSTAVNIČKOG DOMA
PARLAMENTARNE SKUPŠTINE BiH**
n/r članova Kolegija

Na osnovu člana 166. stav (1) i člana 170. stavovi (1) i (2) Poslovnika Predstavničkog doma Parlamentarne skupštine BiH („Službeni glasnik BiH“, br. 79/14, 81/15, 97/15, 78/19, 26/20, 53/22, 59/23, 87/23, 50/24, 73/24 i 56/25), podnosim poslaničku

INICIJATIVU

kojom se Vijeću ministara Bosne i Hercegovine predlaže da hitno pokrene konkretne i operativne mjere humanitarne pomoći civilnom stanovništvu Palestine, te da osigura institucionalnu i humanitarnu podršku izbjeglim osobama iz Palestine koji se nalaze na teritoriji Bosne i Hercegovine.

Obrazloženje:

Predstavnički dom Parlamentarne skupštine Bosne i Hercegovine je u septembru 2024. godine, bez ijednog glasa protiv, usvojio Rezoluciju o zaštiti civila, humanitarnoj pomoći i slobodi izvještavanja medija u Palestini. Članom 10. Rezolucije se naglašava humanitarna dimenzija odgovornosti Bosne i Hercegovine, te se pozivaju nadležne institucije da u skladu sa svojim mogućnostima preduzmu konkretne mjere pomoći civilnom stanovništvu koje trpi posljedice teške humanitarne katastrofe.

Podsjećam također na nerealiziranu inicijativu iz novembra 2023. godine o izdvajanju sredstava za medicinsku pomoć stanovništvu Gaze, sa posebnim akcentom na djecu.

Humanitarna situacija u Palestini tokom zime, prema izvještajima relevantnih međunarodnih organizacija, dostigla je razmjere teške humanitarne katastrofe. Većina stanovništva je prisilno raseljena i primorana da preživljava u improvizovanim skloništima, bez osnovne zaštite od hladnoće, vlage i bolesti. Zimski vremenski uslovi dodatno su pogoršali ionako nehumane okolnosti.

U takvim okolnostima, pomoć u vidu šatora, privremenog smještaja, zimskih paketa, hrane, vode, higijenskih i medicinskih potrepština predstavlja minimum humanitarnog odgovora koji se ne može odgađati niti relativizirati.

Međunarodna praksa jasno pokazuje da je humanitarno djelovanje moguće i u politički složenim okolnostima. Brojne države, uključujući članice Evropske unije i zemlje regiona uputile su konkretnu humanitarnu pomoć civilnom stanovništvu Palestine, bilo kroz finansijsku podršku, isporuku šatora, hrane i medicinske opreme, organizaciju humanitarnih zračnih mostova ili kroz saradnju sa agencijama sistema Ujedinjenih nacija i Međunarodnim komitetom Crvenog krsta. Neke

od tih država su, pored materijalne pomoći, omogućile i liječenje ranjenih civila, posebno djece, u svojim zdravstvenim ustanovama. Ovi primjeri jasno pokazuju da humanitarno djelovanje nije pitanje političkog svrstavanja, već poštivanja osnovnih principa humanosti i međunarodne solidarnosti.

Posebno je važno podsjetiti na činjenicu da se određeni broj palestinskih državljana nalazi na teritoriji Bosne i Hercegovine, uglavnom u statusu tražilaca azila ili osoba pod međunarodnom zaštitom. Njihov položaj, u najvećoj mjeri, trenutno zavisi od solidarnosti građana i humanitarnih organizacija, dok izostaje sistemski institucionalni odgovor države. Smatram da je obaveza Bosne i Hercegovine da kroz nadležne institucije na različitim nivoima vlasti osigura minimalne uslove dostojanstvenog života ovim osobama u skladu sa međunarodnim standardima.

Poslanik SDP BiH

Saša Magazinović

